

ЛҮИМА СЭРИПОС



www.khanty-yasang.ru

Общественно-политическая газета

E-mail: luima@ugracom.ru

Основана 11 февраля 1989 года

13 марта
2015 года
№5
(1095)



А. Вьюкин/Варумхури

Ты хуриг Сужырья павылт блнэ эква Домна Васильеван Хозумова пбсым
блы. Тав павыл нэт халт - щар яныгпала хоппа, 1933 талт самын патыс.
Домна Васильеван сав тал пустагыл вос блы, Най-Отыранбн вос ургалаве.

Ты
номерт
ЛОВИНЬТЭН:

Маньлат
мэхум йильпи
нэпаканыл

4

Лопмус
павыл урыл
потыр

6

Касум мāt
сāлыл кассыт

8-9

Маньци
нэ урыл
потыртасыт

13

Нэквет ос агит
янытлан хōтал
кастыл

16

Соссаң мир магыс йильпи кўщаиң ма ат варава

Та этпост округ Дума колт рўпитан Ассамблея депутатанув сапрани вāрыгласыт. Кўщаиң олнэ хум Еремей Данилович Айпин сав мир акван-атыглас.

Тан ань акв тарвитың вāрмалы урыл потырта-сыт. Мāн округувт хосат тагыл мир ўргалан ос нйврамыт ўргалан тит хотпагынас матрўпитэҗ, руц лātңыл тән тох лававег – Уполномоченный по правам человека ос Уполномоченный по правам ребёнка.

Ань мāн соссаң мир пāлыл пēриим депута-танув акв тамле хотпа кўщаиң ўнттуңкв ном-сысыт, тав соссаң мир ўргалым ос мāньши, ханты мирыг тарвитың вāрмалы ныл ос н-паттым вос рўпиты. Руц лātңыл ты хотпа тох вос лававе – Уполномочен-

ный по правам коренных малочисленных на-родов округа.

Ань ты сапрāнит савсыр кўщаит олсыт. Акв кўщай ойка округ правительство пāлыл олыс. Тав тара лавыс, йильпи кўщай соссаң мир ўргалан магыс ат эри. Ань мāн тарвитың порат олэв, олн атим. Таимāгыс иң акв кўщаиң ма вāруңкв ат эри.

Такос Надежда Ген-надьевна Алексеева ос

Еремей Данилович Ай-пин тав этэ воритотсыҗ, тох нэматыр акван-по-тыртахтын лāтың ат хонтсыт. Ты сапрāнит олум мāхум лаввэсыт, ань олн те атим ос округ яныг кўщаюв ты йиль-пи тэла эт ат те кāсаши, мōтыт тал тән соссаң мир ўргалан ты йиль-пи кўщай урыл элаль потыртаңкв тах патэҗыт.

Валентина ХОЗУМОВА

Пенсия-олныт хумус атавет

Округувт олнэ мир пенсияныл ловинь-тан колт ляххал тотнэ хотпат акван-атыглавэсыт. Тот кўщаиң олнэ нэ Татьяна Зайцева 2015 тал пāсныл пенсия-олныт йильпииг ловиньтан вāрмалы урыл потыртас.

Ань кāсың хотпан вāңкве эри: тав пуссын сэлнэ олнанэ рўпитан матэҗт нэпакн хансым вос олэҗыт. Тыгыл «стра-ховой» олныт савнув виңкве вёрмаве, тән пен-сия магыс ловиньтавет. Мāхум хот-гуйтум олна-ныл паттыг этыл пен-сияныл мощцаг ловинь-тавет.

Мансавит тал нāн стра-ховой олныт ойтэҗын – та таланыл магыс пен-сиян нōх-яныгми. Ань нэ хотпат 55 таланыл тōвлум порат, хум хотпат 60 таланыл тōвлум по-рат пенсиян минуңкве ат ке кāсащэҗыт ос элаль рўпитаңкве патэҗыт ке – тән пенсияныл «преми-альный коэффициент» щирыл элаль тах савми.

1967 талт самын па-тум хотпат ос тыгыл мāньнувэг олнэ кāсың хотпа такви вос пēрии –

тав туп «страховой» ол-ныт акван-атыанэ ма-нос «накопительный» олныт атуңкве паты.

Ань мāхум йильпи щирыл атнэ пенсия-ныл «баллыг» ловинь-тавет. Кāсың элумхолас тал сыс лов балл мус олн миңкве вёрми. Ты мāгыс тавен тал сыс 624 сōтыра солкōви сэлуңкве эри. Хунь пус-сын акван-ловиньтым 30 балл акван-аты, тōнт тав матумпалаг ёмтнэ порат пенсиял (пенсия по старости – руц ши-рыл) ойтуңкве патаве.

Матыр урыл нāн к и т ы г л а х т у ң к в е таңхегын ке – нāнки Пенсионный фонд ищхйпың лōпсэт матыр-āti хонтуңкве вёрмеҗын. Тот пенсиян атнэ олныт «баллыг» ловиньтан ха-ништап олы.

Тамара МЕРОВА

Ты этпос 6 хоталэт Ханты-Мансийск ўст Семейный совет нампа сапрāни олсыт. Сав нйврам оцнэ щāнит-āщит, нйврам ханич-тан хотпат, лёккарыт ос кārкамыг рўпитан мāхум округ янытыл тув вōвиньтāлвэсыт.

Пёс йис вāрмалит урыл потыр олсы

Овлэт тән школат, пўльницат, āгмың-мосың хотпатн нётнэ колыт ос спорт щирыл рўпитан колыт хумус рўпитэҗыт, та урыл по-тыртасыт. Ань обще-ственный организаци-ят тән уральтасаныл ос шар мāk ёмашакв рўпитан кол пēриясыт. Наталья Комарова ос ты урыл лавыс: «Мāхум пўльницат, школат, мирн нётнэ колыт ураль-тым ёмашакв рўпитан хотпат пēриясыт. Мāн аньвāглув, хотыпāвлытт манос ўсытт кārкам мāхум олэҗыт. Тāнаныл янытлаңкве патыанў».

Ты тал округувт соссаң мир пёс накыт янытлан тāлыг намайвес. Ман-хурип рўпата ты ка-стыл округувт варава, та урыл потыр ос олсы. Вячеслав Кондин, «То-рум Маа» нампа музейт

рўпитан хум, ялпың хоталыт урыл лāтың лавыс. Мāньполь этпос оигпан элы-пāлт тән «Тылащ пори» ялпың хотал вāрэҗыт. Туи по-рат Нефтеюганский рай-онын мāньщит, хантыт мāньхāпыл касуңкве акван-атыглыяныл. Ты тал тән овыл щёс «Вит-хон» ялпың хотал тах щёпитэҗыт. Ты конь-пал тән тал сыс сав мōт ялпың хоталытн мўй мāхум тах вōвыглыяныл.

Ты юи-пāлт Фёкла Бондаренко, Нижне-вартовский район Аган пāвыл олнэ ремёсла центрыт кўщай эква, ос округ общинатыт рўпитан хотпат соссаң мир культураныл элаль тотнэ вāрмалит ос тāнки тэланыл урыл потыр-тасыт.

Людмила АЛГАДЬЕВА

ЛЯХХАЛЫТ

Самын патум манын эруптэлын

Рётың юсвой этпос 25 хөталт Ханты-Мансийск үст Общественный палатат рүпитан махум заседание вāрыгласыт.

Сапрāни овылтахтама порат тот кўшаиг рүпитан эква Любовь Чистова тох лāвыс: «Ань юи-овыл тāлытт «патриот» лāтың щар хот-ёрувлас. Вāтихал мāнлюль нак вāрнэ хөтпат урыл хўнтамлāлэв. Мāнки олнэ-хўлнэ наханув ос йис порат олум вāрмалит ул вос ёрувлахтасыт, тымāгыс мощ мōлалнув округувт эрнэ тēла урыл хансум нэпак пирмайтас. Тыт олнэ мирув тāнки мāнаныл вос ўргаласаныл, кāсың хөтпа юртыңыщ вос олыс, тьи ос мōт тēлат урыл тот хансым олы. Ты вāрмалитн нйврамыт мāнь тāгыл ханищтаңкве эрēгыт».

Ты тēла элаль тотнэ урыл потыртан мāгыс савсыр мātт рүпитан кўшаит ёхталасыт. Мāньлат махум нётнэ кўчай хум

Антон Тимкин, ты вāрмаль урыл тох лāвыс: «Кāсың хөтпа такви самын патум мātэ вос ўргалытэ, мāн ты урыл акваг потыртэв. Мāн тōнт военно-патриотическое воспитание урыл номсэв. Округувт савыңпālэ нйврамыт пуссын ты вāрмалын ханищтавет.

Мāн таимāгыс ань атхатсўв, нйвраманув мōт эрнэ тēла щирыл ос вос ханищтавет. Ты вāрмалы сав янас миннэ тов оныщи: олнэ-хўлнэ накыт, йис олупса, мā-вит ўргалан тēла, ёмас щирыл олнэ нак, каснэ вāрмалит ос мōт сав тēлат щирыл рүпата вāруңкве ань эри.

Тувыл ань мāнь нйврамыт коньпал āгит-пыгыт, мāньлат хөтпатосяныг хөтпат, пуссын аквтем ты вāрмалин ханищтаңкве патавет. Кāсың хөтпа такви самын патум мātэ вос эруптытэ. Тōнт мāн мирув щуниңнувэг ос щёлыңнувэг ёмты.

Николай МЕРОВ

Налог-олн урыл ляххал

Ольга Литова налог-олн акван-атнэ мāt кўшаиг олы. Тав декларация-нэпак урыл потыртас. 2014 тāl сыс округувт сав олн сэлнэ махум тāнки нэпаканыл яныгполь этпос 30 хөталэ мус тāн палтаныл вос кётыяныл ос ойттур этпос 15 хөталэ мус налог-олн вос ойтэгыт. Ты рүпата ат ке вāрēгыт, тāн штрафыл пинавет.

Кўчай нэ лāвме щирыл, та тāl сыс тыт олнэ мир пуссын аквѣт 70 млрд. солкōви налог-олн ойтсыт. Округувт ань 8 щёлың хөтпа олы, тāн халанылт акв элумхōлас тāl сыс 10 млрд. солкōви сёлыс. 7 хөтпат миллионерыг олēгыт.

Щёмья кол ке ёвтыс, нэг-хумыг сас налог-олныл ювле ань ойтавэг. Акв элумхōлас кит миллион солкōвилныл 13% савит налог-олныл ювле миве. Щёмья кол ёвтнэ нэпаканыл тāн палтын ке кётыныяныл, нэг-хумыг сас 260 сōтыра солкōви ойтавет. Тох акв щёмья 520 сōтыра сокōвил виңкве вёрми.

Людмила ТЕТКИНА

Музеитыт рүпитан хөтпат

Рётың юсвой этпос 25-26 хөталагёт Ханты-Мансийск үст «Центр народных художественных промыслов и ремесел» колт округ янытыл савсыр музеитыт рүпитан махум акван-атхатыгласыт. Ты акван-хөнтхатыглап тох намаим олыс: XV Координационный совет субъектов сферы народных художественных промыслов и ремесел.

Тāн халанылт соссаң хөтпат ос олсыт: Сургут ўсныл «Старый Сургут» историко-культурный центрныл мāныщи нэ М.В. Самсонова ёхталас, тав соссаң мир отделт кўшаиг рүпиты; хантынэ Ф.С. Бондаренко Нижневартковский район Аган пāвилныл олыс, такви пāвлэт музейт кўшаиг олы; Белоярский ўсныл ханты нэ М.В. Кабакова ёхталас, тав ос пёс йис пормас суссылтан мāt рүпиты. Мōт махум Нефтеюганск, Мегион, Лян-

тор, Советский ос Урай ўсытныл олсыт.

Овыл лāтың округ янытыл культура тēла палт кўшаиг олнэ нэ Н.М. Казначеева тав лāвыс. Тув ёхталам махум тав янытласанэ, там-ле тārвитың ос аквты эрнэ рүпата вāрнэныл мāгыс сав ёмас сымың лāтың лāвыс. Тувыл ты кол кўчай нэ Ольга Дмитриевна Бубновене потыртас: «Округув янытыл 32 мāщтыр хөтпа олы. Мāн махманув 2014 тāl сыс округув коньпал Россияв яны-



тыл ос элы хōн мāt 29 савсыр конкурсытыт нōх-патыгласыт. Пуссын янытлан нэпакытыл ос савсыр мўйлупсатыл майвёсыт.

Тыянгыщ Сургут, Лянтор ос Урай ўсытт олнэ хөтпанув. Мāн пуссын аквѣт эрнэ тēла вāрēв. Мāн катыл вāрум пормасанув сав мāt вāвет, сунсыглавет, пўмщалавет».

Кит хөтал сыс кāсың хөтпа такви рүпататэ урыл потыртас, ань ювле хультум тāl сыс тēланыл хумус вāрсаныл, матыр тārвит оныщегыт ман пуссын ёмас, ты урыл потыртасыт. Ищхипың ут хосыт кина охсат ос савсыр хурит суссылтасыт.

Светлана РОМБАНДЕЕВА

Мāнылат мāхум йильпи нэпаканыл



Литература тал янытлан кастыл Ханты-Мансийск үст нэпак ловиньтан колт вāтихал йильпи нэпакыт суссылтавет. Рётың юсвой этпос оигпан элы-пāлт тот Ульяна Данило, «Ханты ясанг» намба газетат рўпитан нэ, такви тāратам нэпаке урыл мāхумн потыртас.

Андрей Дубасов, Елена Ермакова, Андрей Молданов, Анна Молданова, Виктория Молданова, Владислав Молданов, Арсений Немельгин, Олеся Сопочина, Валентина Тар-

лина мāнылат мāхум хансум стиханыл ос Ульяна Данило такви хансум мōйтанэ тув вāрсанэ. Нэпаке «При- токи Великой Оби» на- маястэ. Тамле рўпата вāрункве тавен «Югра лылыеп» намба орга- низация нётыс, олн ос общественный связь Департамент пāлыл майвес.

Ульяна Данило нэпаке хумус щёпитаствэ ос ты мāньшит, ханты мāнылат хотпат ёт ху- мус вāйхатас, та урыл потыртас. Ты юи-пāлт āгит-пыгыт тāнки сти- ханыл ловиньтасаныл.

Павел Черкашин, нэпак хаснэ хум, лāвыс: «Потрыт ос стихыт хас- нэ мāнылат хотпатн

нётуңкве эри. Тāн яныг поэтыг манос писате- лиг вос ёмтёгыт, хансум рўпатаныл мāхумн сав щāгт вос тотёгыт».

Мария Кузьминична Волдина ты нэпак урыл ос потыртас. Ханты эква лāвме щирыл, тōва по- трыт ос стихыт руц лātңыл лўольсаң хансым олэгыт. Тамле нэпакыт тāратан элы-пāлт овлёт ты рўпата вāнэ хотпат ёт рўпитаңкве эрыс. Ты нэпак тāратам мāхум ос мāнылат хотпат руц лāтың ёма- щакв ханищтаңкве лāвсанэ. Ты хосыт элаль рўпитаңкве ке патэгыт, туп ты юи-пāлт ёмас вāрмалы тах тэлы.

Людмила ТЕТКИНА



Нэквет мāгыс вāрим суссылтап

Нэ хотпат янытлан хотал олум кастыл мāн ўсувт сав пўмыщ сус- сылтап вāрыглавес. Акв суссылтап «Мā-вит ос элмхолас» намба музейт олыс, руц лātңыл тамле намыл пинвес – «Цветы. Камни. Горы».

Ты музейт рўпитан мāхум Нёранув ну- пыл тув порат ялсыт. Сав āхвтас тот атмыт. Ятрия, Лопсия, Мāнья, Сўкыръя, Пуйва, Ули- тимья ос Тагт я хосыт яласамыт. Тōва мāt тāн

сака нётнэ ос тының āхвтасыт хонтсыт.

Та мāхум халт савсыр учёный хотпат олсыт, акв эква биологыт олы, тав хорамың лўпта ха- нищтым тāн ётаныл ялыс. Тав сав пўмыщ хури вāрыс. Ань ты вы- ставкат тав такви пōслум хуриянэ суссылтасанэ ослāвыс, «красный кни- ган» хансым сав лўпта тав Нёранувт хонтыс.

Валентина
ВАСИЛЬЕВА

Яныгпāла ойка пōслум хуриянэ

Геннадий Степанович Райшев 80 тālэ намхоталэ кастыл пōслум хуриянэ йильпи нэпакыт тāратавёсыт. Ты альбом «Геннадий Райшев. Живопись 1960-2010» намаим олы. Тав та тāлыт сыс тōва пōслум хуриянэ тув вāрвёсыт.

Йильпи нэпакет хўрумсат арыгкем акван-атым пōслум хурит олэгыт. Геннадий Райшев Ханты- Мансийск үст рўпитан колёт ошнэ хуриянэ, тувыл Екатеринбургыт ос Тюменьт олнэ музейтныл то- тым хурит пуссын тув вāрвёсыт. Ань ты йильпи нэпаке мўй мāхумн суссылтавет.

Хорамың яныг нэпакёт ниласāt савит лōпсыт савсыр хурит коньпал ойка олупсатэ урыл потыр, тав ётэ рўпитан мāхманэ потрыт ос хасвёсыт. Нэпак округ культура департамент пāлыл олныл ойту- вес. Екатеринбург үст «Баско» намба издательство- колт тāратавес. Тав тираже кит сōтыра хотсāt савитыг олы.

Ань Геннадий Степанович палт ёхталам мўй мāхум пуссын тамле нэпакыл мўйлуптавёсыт.

Ойка ты овылтыт лāвыс: «Атпан тал сыс пōслум хуриянум ань акван-атвёсыт, матъёмас ты рўпата вāрвес. Таимāгыс хот-щāгтым олэгум ос āнумн нётнэ хотпатн пўмашипа лāтың лāвэгум».

Тамара МЕРОВА

КҮЩАИТ РҮПАТАНЫЛ

Номтың нйврамыт нётавет

Та этпос 18 хоталёт округ кўшай ваҕын хум А. Путин заседание вāрыглас. Округувт щёмьятн ос нйврамытн нётмил вāрнэ программа хумус рўпиты, ты урыл тот потыртасыт.

Ань сав хаништахтын колыт олэгыт, мак номтың нйврамыт хумус тот нётавет, ты урыл С. М. Буторина потыртас. Тав культура департамент кўшай ваҕын хотпаг рўпиты. Нё лавыс,

нйврамыт магыс сав рўпата тыт вāраве, щар номтың нйврамыт савсыр вāрмалын хаништавет. Тāн магсыланыл хўрум яныг хаништап кол олы: Сургут ўст руц махум олнэ-хўлнэ накыт элаль тотнэ колледж ос акв яныг ёнгын кол тот олы. Ханты-Мансийск ўс искусства Центр кол рўпиты.

Савсыр мат пуссын аквьёт налыман нупыл ат сotyра номтың агит-пыгыт хаништахтэгыт.

Ты нйврам маныр тэла щирыл хаништахтункве таңхёгыт, тāн нётавет.

Тāн номтаныл элаль тотнэ магыс 2014 талт нйврамыт магыс культура программа щирыл китхуйпов мероприятие вāрыглавес, конкурсыт, суссылтапыт ос фестивалит олсыт. Ос щар номтың нйврамыт всероссийский касылн элаль касуңкве тах кётавет.

Николай
МЕРОВ

Хонтаң маңыщит олупсаныл

Кондинский район По-
Кловинка пāвылт мир-
кол кўшаиг Александр Ана-
тольевич Немзоров олы. Ты
элы-пāлт тав сав тал школат
нйврам ханищтым рўпитас.
Пāвылт пёриян вāрмалы
олум порат Александр Ана-
тольевич мот махум халт
нōх-патыс. Ань сат тал мир-
колт кўшаиг рўпиты.

Пāвылт ань акв сotyра 536
элумхōлас олы, тāн халанылт
348 – соссаң махум. Ты кўшай
хум тāн олупсаныл урыл ки-
тыгласлум. Александр Анато-
льевич тамле потыр онышас:
«Кондинский район пёс йис
таңгыт маңыщит олэгыт. Ты
магсыл пāвлувт олнэ соссаң
мир халт сав хотпат маңыщиг
ловиньтахтэгыт. Тāн щāнь
лāтың ат вāгыт, потыртаңкве
ат хасэгыт, тāнки пёс йис
вāрмаланыл урыл сака аты
пўмшалахтэгыт. Тōва хотпанув
тонт маңыщиг лāвхатэгыт, хунь
нётмил вōвуңкве ёхтэгыт.

Ам тыт сав тал олэгум,
маңыщи манос ханты лātңыг ат
хўлыгласлум. Молты тал мāн
палтув Еремей Айпин, нэпахас-
нэ хум, ёхталас. Пāвлың мир ёт
тав библиотекат хонтхатыглас.
Тонт тав такви щāнь лātңыл по-
тыртас. Ам хантылāтың тотōвыл
щёс хўлыслум.

Пāвлувт музей олы, ты кол
Анатолий Николаевич Хомяков
вāрыстэ. Хонтаң маңыщит пёс
пормасаныл тув акван-атсанэ.
Ты ойка округ янытыл ёмашак-
ве вāве, янытлаве. Ань тав агитэ



Галина Анатольевна Мостовых
музейт кўшаиг олы, тав вāрум
рўпататэ элаль тотытэ. Ань туп
музейт рўпитан махум маңыщи
пёс йис вāрмаланыл ханищтэгыт
ос пўмшалэгыт.

Касың тал туи порат мāн хўл
алышлан хотпат янытлан хотал
вāрыглэв. Лўимā департамент
олме поратты ялпың хотал магсыл
олныл тастыглавесўв. Ань пāвлувт
рўпитан предприниматель-
хотпат палт олн вōвёв. Я ватат
хўл йсмит пāйтэв, мўй махум
пуссын тытыанўв.

Урай ўсныл сав мир мўйлуңкве
тыг ёхталэгыт. Тот пил, лāхыс,
хўл ос мот тэнут тыналаве. Мўй
хотпат ты тэнут сака ёмашак-
ве ёвтэгыт. Мащтыр махум
савсыр сувенир-пормасыт тот
тыналэгыт. Касың элумхōлас
тот сāлы сун ўлтта поргуңкве,
тынышан пāхтуңкве ос мот щир-
ыл касуңкве вёрми. Ты ялпың
хотал мāн, мирколт, музейт ос
клубт рўпитан махум, аквьёт

щёпитэв. Музей Ыринэква хотал
ос мот ялпың хоталыт вāрыглы,
мāн мўйлуңкве пуссын тув
ялантэв».

Ань округувт соссаң махум
кол ёвтнэ магсыл программа
олы. Манасавит щёмья пāвылт
ты программа хосыт олнэ кол
ёвтсыт, ам миркол кўшай хум
китыгласлум. Тав ювле лāвыс:
«Ты программа хунь пирмай-
тавес, соссаң махманув пуссын
лāвсанув, нэпаканыл вос ак-
ван-атыяныл ос очередин вос
хасхатэгыт.

2012 талт кит щёмья субси-
дия-олныл майвесыг, олнэ кол
тыт ўнттысыг. 2013 талт акв
щёмья олнэ кол Урай ўст ёвтыс.
Ос ювле хультум талт тыт олнэ
маңыщит, ханты щёмьят олныл ат
майлувёсыт. Тāн пуссын Хан-
ты-Мансийск ўст акв очередин
хасвёсыт. Махум нэпаканыл ань
тāра тув кётыяныл, тыи магсыл
мāн ат вāглўв, манасавит пāвылт
олнэ соссаң щёмьят тув хансым
олэгыт».

Пāвылт общинат рўпитэгыт
ман āти, та урыл ос пумща-
лахтасум. Тав ос ювле тох по-
тыртас: «Ам пāвлың махум
лāвыгласанум, общинат тыт вос
вāрэгыт, савсыр нэпакыт акван-
атуңкв мāн нётыянув. Там-
ле рўпата вāруңкве нэмхотыют
ат касашас. Ань Г.А. Мостовых,
музей кўшай нэ, тамле община
вāруңкве таңхи. Мāн олнэ мāvт
сав лāхыс, пилыт, яныгмёгыт, ят
сав хўл олы. Ам номсэгум, об-
щинав ёмашакве рўпитаңкве
тах паты».

Людмила ТАСМАНОВА

ПАВЛЫҢ МИР ӨЛҮПСА

Лөпмус павыл урыл потыр

Рётың юсвой этпост ам Хальүс район Лөпмус павылн ялсум. Ты маныщи павыл йис тагыл Төрүм лёңх сүнт павлыг лававе. Тот школа ос пүльница ылы, лапка рүпиты. Найпос минэ станция рүпиты, найаныл этэ-хоталэ тэг.

Павыл тэланэ уральтаңкве Николай Алексеевич Солянов тав паттувес, тав Кульпас павыл кұшай ваңын хумыг ылы. Тав лавнэтэ щирыл, павыл махум ань мощ ёмашаквнүв олуңкве патсыт. Ювле хультум талт кит-хүрум квартираң ат кол ұнттувес. Ты колыт ұнттын мат кұшаиг Ягрим павыл Полуянов ойка ос Кульпас павыл Голошубин хум тэн олсыг. Олнэ кол ат оныщам махум ман пёс колт олум хотпат тән тув вантлысыт. Полуянов ойка ты тал ко-

лыт ұнттуңкве ос номсы. Манах кол ұнттёгыт тах, мощ ётылнүве тара ущ паты.

Лапка касың хотал рүпиты, йильпи тәнүт ватихал тотыглаве. Савсыр пормас, маснут, няврамыт магыс сыресыр ёнгил та маныр тот пуссын ылы. Йильпи пүльница ұнттувес, савсыр ёрнэ пормасыт тув тотвёсыт. Лёккар экваныл мощёртн тот рүпитаңкве паты, ань пусмалтан пормасыт тув тотавет, рүпитан магыс пүльница щёпитыяныл. Тыгле-тувле яласан лёңханыл ёмашакв



Йильпи колыт ұнттувёсыт



Танварп эква Ёс шахыл



Хурит школат ханищтахан пыгрищиг пёсым өлэг – Петя Меро ос Максим Бешкильцев

варим ылы. Павланыл тара Саранпавыл манос Хальүс мус автобус яласы.

Николай Алексеевич лавыс, туп таи люль – потыртан связь утаныл сака люльсан рүпиты. Вышка тущтувес кос, ос ёмашакв вәруңкве ань ты хотал мус иң ат та вёрмияныл. Ты тэла вәрнэ хотпат маныполь этпост ёхтуңкв лавсыт, эрттам тонт ёмашакв ущ вәрияныл. Павыл махум мұсхал щирыл звонитаңкве ат вёрмёгыт. Акв хотты ур хонтёгыт, тув минёгыт, тот та потыртёгыт. Потыртаңкве ущ ывылтахтёгыт, связяныл хот та утыгпи, тувыл телефонрищаныл такос волкалтыяныл, нәматыр суй атим. Ащирма порат тох кон люлим та

пөльтахтёгыт.

Элнаң тамле связь атим ылыс, сака ат иң эрыс. Ань ты йист савсыр ищхипың утыт квалтапаптүвёсыт, щёп телефон ань сав хотпа оныщёгыт.

Тувыл ос клуб кол павылт атим. Клубыл ұнттуңквелаввёсыткос, ос хунь ывылтаве, хунь вәве. Тот нэпак ошнэ яныг колнак – библиотека вәраве тах. Ань тав школат ылы, павыл махум ловиньтан нэпак магыс тув ялантёгыт.

Лөпмус павыл ятил маныщи махуматенув пуссын пустагыл вос олэгыт, Най-Отыранылн вос ўргалавет! Пус кат, пус лагыл!

**Светлана
РОМБАНДЕЕВА**

ПУСТАҖЫЛ ӨЛЭН

Тав номтэ рўтанэн элаль тотаве



Рётың юсвой этпос оигпанэ поратокругянытыл маныщи мир Хальүс районын атхатаңкв та патсыт. Сав мир Саранпавылн, Лопмусн ос Кульпасн ёхтысыт. Тән ёсал каснэ вәрмалын ёхталасыт, маныщи хумиов Андрей Яковлевич Хатанев кәсталанщирыл тав ты вәрыглаве. Ты тәл «Лыжнёй Андрея» сатытыг ты минас.

Андрей Яковлевич өлме порат ёмас, кәркам ос акваг ошхуль вәрнэ хумыг олыс. Тащирыл тав нотпаң махум потыртэгыт. Няврамыт ань тав урёт ос ёмщаквөг вәгыт. Хүрум павыл халт ёсал ёмнэ махум касың тәл ты савмёгыт. Төват касың тәл яласэгыт. Ань Саранпавыл ос Кульпас махманув нәмхоталь юв ат хультэгыт, нявраманыл ос кәркамыг хайтэгыт. (Ёсал хайтнэ пұмаш урыл мотыт газетат ловиньтән).

Александр ВЬЮТКИН



Касум мат сáлыл кассыт

**Ты тál рётың юсвой этпос 28 хоталэт
Белоярский район Касум пáвылт сáлың
мáхум мáгыс каснэ вáрмалы щёпитáлвес.
Ты пáвылт пуссын аквёт 1 сóтыра 700
сáвиткем хотпа олы, сáвыңпáлэ - ханты
ос саран хотпат.**

Тан тот йис тáгыл
олэгыт, хул алыщлэгыт
ос сáлы янмалтэгыт.
Округув янытыл шар
сáв сáлы тот ты оныщаве.
Юильск, Касум ос Нумто
пáвлыт халт яныгсат сáт
щёмья сáлы ўрим яласы.
Тан пуссын хот сóтыра
арыгтем сáлы оныщэгыт.
Тайёмас, мáнылат хотпат
сáлы ўрим тан ётаныл ос
рўпитэгыт.

Тот о́лнэ сáлың мáхум
кáсың тál тамле каснэ
вáрмалил щёпитáлавет.
Ты тál касыл нёлсат
нупыл хотыт щёс
вáрыглавес. Ань тот
вáтахкем сáлың нэ-хум
хотпа касыс. Ты пұмаш
вáрмалын элы ўсытныл,
пáвлытныл сáв мир ак-
ван-атхатыглас. Ты ко-
ныпал хон мáныл о́лнэ
мáхум ос мўйлункве тув
ёхталасыт.

Сáлыл каснэ вáрмалы
пуснэ хоталт кўщаит ос
олсыт. Тан каснэ хотпат
ос мўй мáхум нупыл сáв
сымың лáтың лáвсыт.
Сергей Петрович Ма-
ненко́в, Белоярский
район кўщай хум, сáлың
мáхум тáрвитың рўпата
вáрнэныл мáгыс пуссын
янытласанэ ос лáвыс:
«Ам тыт о́лнэ сáлың
хотпат, сáвыңпáлэ пус-
сын ёмщакв вáганум.
Тан ётаныл кáсың тál
вáщинтахтэгум. Ты ка-
сылн áти туп мўйлупса
сэлнэ мáгыс ёхталэгыт.
Хотьютаныл кáркамнув,
моляхнув яласы,
тáксарнув олы, тан тыт
тáнки халанылт ёраныл
áрталыяныл».

Тувыл ос тамле ёмас
вáрмалы о́лыс. Сергей
Петрович «Казымский»
нампá сáлың мáхум



предприя́тия́н, кре-
стья́нско-ферме́рский
хозяйстватн не́тнэ мáгыс
500 сóтыра солкóви
о́щнэ сертификáт-нэпак
мис. Акв предприятие
кўщаит Сергей Иосифо-
вич Попов рўпиты. Тав
сáлыт элалы сáвмалтан
мáгыс олныл ты май-
вес. Сáв тál рўпитан
сáлың хотпат пуссын
почётный грамотал
мўйлуптавёсыт. Кўщай
хум кáсың хотпан ём-
щакв мўйлункве лáвыс.
Тувыл мот кўщаит по-
траныл юи-пáлт сáлың

мáхум касуңкве та
овылтахтасыт.

Касум пáвыл ляпат
Амня я о́вты. Та ят каснэ
вáрмалы ты щёпитáлвес.
Сáлың суныл миннэ
лёңх 1 сóтыра 500 метра
палытэ о́лыс. Тóва сáлың
хотпат Сургутский рай-
онныл ёхталасыт. Тан
ань нила вáрмалы щи-
рыл кассыт.

Сáлыт рóттыг хáйтнэ
касылт хумит халт ты
хотпат нóх-патсыт:

– о́выл места Нико-
лай Павлович Тасма-
нов вис, китыт места -





Сергей Петрович Канев, хұрмит места - Михаил Кузьмич Молданов.

Салыт сұлтыл мин-нэ порат ты хөтпат нөх-патсыт:

– овыл места Сергей Петрович Канев вис, китыт места – Иван Алексеевич Попов, хұрмит места – Алексей Павлович Тасьманов вис.

Салың сун тармыл лүлим каснэ порат ос ты хөтпат нөх-патсыт:

– овыл места Иван Алексеевич Попов, яныгпала хумхөтпавис, китыт места-Сергей Петрович Канев, хұрмитыг ос Юрий Кузьмич Тарлин ёхтыс.

Товыльтармылкасым ты хөтпат нөх-патсыт:

– овыл места Иван Алексеевич Попов вис,

китыт места – Сергей Петрович Канев, хұрмит места – Пётр Алексеевич Попов.

Салыт юи-палт ёсал миным ты хөтпат нөх-патсыт:

– овыл места Иван Алексеевич Попов вис, китыт места – Юрий Кузьмич Тарлин, хұрмитыг ос Алексей Павлович Тасьманов ёхтыс.

Экват халт сәлың суныл сұлттым ты хөтпат нөх-патсыт:

– овыл места Лариса Алексеевна Попова вис, китыт места – Надежда Петровна Попова, хұрмитыг ос Светлана Владимировна Канева ёхтыс.

Маньлат нэ хөтпат халт сәлы юи-палт ёсал миным осты хөтпат нөх-патсыт:

– овыл места Екатерина Рандымова вис, китыт места – Ирина Тарлина, хұрмит места-Любовь Рандымова.

Амня я нәлми вәтат яныг музей-ўскве ўнттымылы. Тот ёрнколыт тўштыглавёсыт. Мўй маҳум мағыс атың тәнүт пәйтвес. Тот пёс йис пормасыт атнэ колыт рўпитасыт. Кон ос савсыр хұл, нёвыль, пил, ләхыс, матыр-әти пуссын тынала-вес. Мўй маҳум тәнки



магсыланыл матыр тәнүт-пормас ёвтүңкве вөрмысыт.

Сәлыл каснэ вәрмалы миннэ торыг маньлат хөтпат мағыс ос янас касылыт щёпитәлвёсыт. Тән сәлы сун ўлтта поргысыт, тыныщан пәхвтысыт ос пёрщисыт. Каркам, тәксар хөтпат ос пуссын мўйлупсал майвёсыт. Ыскве котильт яныг палатка тўштыглавёс. Ёнгын колыт тот нётнэ йиквыт йиквсыт, эргыт эргысыт ос нётнэ таныт сәңквылтасыт. Татем пұмаш ялпың хөтал олыс.

Та ўсквен щалтнэ мағыс яныг хөтпан яныгсәт солкөви, няврамын ос атпан солкөви ойтуңкве эрыс. Пайтым тәнүт ос олн мағыс ёрнколт тынала-

вес. Ты әти, ты ялпың хөталн сав мир ёхталас. Касың хөтпа щәгтым ўшлахтас.

Ты ялпың хөтал мўсхал щирыл щёпитан мағыс Любовь Филиппова ос Анна Коптелова «Ханты-Мансийский банк» пәлыл мўйлупсал майвёсыг. Тувыл «Единая Россия» нампa партият рўпитан маҳум мащтыр хөтпатн Ксения Григорьевна Ерныхован, Мария Степановна Молданован ос Ирина Семёновна Молданован мўйлупса мисыт. Хотьют касыл щёпитас, тән пуссын мўйлупсал майвёсыт. Нәмхотьют пөхыт ат хульгыс. Там-ле ты ёмас ялпың хөтал Касум павылт олыс.

Николай МЕРОВ



Мань нйврамаквет ханищтан нэ

Ольга Норова, такви бпарищ наме Анямова, Ханты-Мансийск үст өлнэ «Лылын сёюм» намба центрыт мань нйврамаквет ханищтан нэг рүпиты. Тав 1997 талт Санкт-Петербург үст А.И. Герцен намба университет астам юи-палт Ханты-Мансийскан ёхтыс. Өвлэт садикыт мань нйврамыт ёт рүпитас, ос ётыл «Лылын сёюм» соссаң нйвраманув ханищтан колн рүпитаңкве вөввес.

Тот тав 5 тал яныт агиришит-пыгришит «Витсам» намба программа щирыл ханищтыанэ. Ос 7-9 тал яныт нйврамыт магыс «Этвитсам» намба программа оныщи. Ты ханищтапыг Ольга Мартыновна такви хассаге. Ты хосыт савсыр агиришит-пыгришит маньщи латың ваңкве ханищтавет.

Касың ханищтап кит щёс-охсаг ұртым варава. Аквщёс-охсатнйврамыт матыр тэлат овылтыт потыртавет, суссылтавет ос ётыл тан танки ювле потыртёгыт. Тан хорамың нэпак-лөмтыл савсыр пормас, хурит вэрёгыт, ты мус амшит

амщёгыт манос мөйтыл мөйтавет. Ос ётыл овыл щёс хунтамам латңыт ёмщаквег ханищтыаныл, тананыл торгамтым вос ваганыл.

Тувыл ювле хуль-тум ат тал порат Ольга Норова «Витсам» хансум программатэ щирыл үст өлнэ садикыт ёт рүпитаңкве патыс. Тав «Голубок», «Золотая рыбка», «Радуга» ос «Солнышко» садикытн ялантан нйврамыт мощ ханищтасанэ. Осты программатэ щирыл №5 ос №11 школагт ханищтахан нйврамыт ёт рүпитас. Школат «краеведение» урокыт өлнэныл порат Ольга Мартыновна тув вөвиньталаве.



Тав нйврамытн Юграт өлнэ соссаң махум пёс наманыл, нэпак хаснэ хөтпат, хурит пёслан хөтпат урыл потырты ос това вэрмалит маньщи латңыл лавиянэ.

Нйврамыт савсыр тэлат ёмщаквег ос молях вос торгамтасаныл, Ольга Норова савсыр ханищтан нэпакыт щёпитас. Тыи «Латңыт хансуңкве х а н и щ т а х т ё в », «Латңыт ловиньтаңкве ханищтахтэв», «Савитэ ловиньтаңкве ос лавуңкве ханищтахтэв» намаим нэпакыт. Тув эрнэ хурит манос сыресыр латңыт Ольга Мартыновна ос такви щёпитасанэ. Тав маньтагыл пёслы, хуриянэ пүмшиг өлэгыт. «Пёслын нэпак», «Мавит ольпат» намба кит янас нэпакыг вэрыс, тот савсыр пормасыт хурияныл пёслым өлэгыт. Нйврамыт латңыт ханищтан коньпал хурит өлюптаңкве вөрмёгыт.

Ты нэпаканэ таратан магыс Ольга Норова округ Правительство ос культура департамент палыл грант-олн вуйлас. Финляндият өлнэ М.А. Кастрен намба общество ос Музейное

Ведомство палыл тав «Культурное наследие финно-угорских народов» хансум проектэ магыс ос олныл майлу-вес. Ос округ губернаторн «Лучший педагог дополнительного образования» намаим грант-олныл мүйлуптавес.

Маньщи махум пёс йис наманыл манос латңаныл элалы тотнэ хөтпат үст ке өлэгыт, сака ёмас. Ольга аквтох «Югра» телерадиокомпаният маньщи латың ханищтан нэг рүпиты. Тот «Югорика» передача ты олы, нан төвнакт таве ул сунсылын.

Тувыл соссаң махум ялпың хөталаныл ванэ магыс нйврамыт сыресыр ёнгылыл, суссылтапыл пүмщалавет. «Лылын сёюм» центрыт рүпитан хөтпат «Тылащ пори», «Ұринэква хөтал», «Ома хөтал» ос мөт ялпың хөталыт вэрнэ порат танки кас вэрёгыт. Йильпи тал янытлан ялпың хөтал кастыл агиришит-пыгришит магыс тан пүмщ спектаклит акваг щёпиталэгыт. Тан пуссын ёнгиланыл соссаң махум мөйтаныл щирыл вэрияныл. Та талт Ольга Мартыновна Миснэ агииг ёнгыс.

Ань нэ хөтпа ялпың хөтал кастыл ман таве янытлылүв, тавён ос щёмьятэн ёмас сымың латың лавёв. Ольга ойкатэнтыл кит пыг ос кит аги янмалтэг. Пус кат, пус лагыл, Төрүм ёт, Най-Отыранылн вос үргалавет.

Тамара
САКВЪЯНЫЛ



Тав юнсахатым олн сэлэ

Округувт 2015 тал соссаң мир пёс накыт янытлан талыг намаявес. Ты кастыл ам акв мащтыр нэ урыл потыр хансэгум. Ольга Витальевна Мингалёва Октябрьский район Карымкары павылт олы. Тав тот самын патыс, тот яныгмас. Школан астан юи-палт Тобольск уст ханищтахтас.

Та пора урыл Ольга Витальевна лавыс: «Ам павылн ювле хунь ёхтысум, школат рупитаңкве патсум. Биология предмет щирыл няврамыт ханищтасанум. Тувыл хум варсум, няврамён самын патыс. Пыгум янмалтым юн олсум, ат рупитасум.

Акв порат ўщим ам палтум ёхтыс, а́нум сакныл хартуңкве ханищтастэ. Сакныл савсыр пальсакыт, турлөпсыт хартуңкве а́нумн сака мустыс. Тонт тав Ханты-Мансийск уст ремёсла центрыт рупитас.

Карымкары павылн ёхталым, а́нум тох мащтырлаңкве ханищтастэ.

Ты юи-палт ам сасныл ма́нь хусапыт, а́канит ос мот пормасыт варуңкве патсум. Ань савсыр нэпакыт таратавет, тот ты вармалы урыл сав хансым олы. Тыщир мащтырлаңкве амки та ханищтахтасум. Пёс порат ма́ньшит, хантыт сас яңк нәтнэ этпос оигпан манос лүпта этпос овылтахан поратщөпитасыт. Амосты порат сас нуоңкве ворн ялантэгум.



Мащтырлаңкве а́нум сака мусты, тыи ма́гсыл школаныл пөхын минасум. Ань савсыр сувенирыт варим олн сэлэгум. Ты пормасыт савсыр выставкатт суссылтыанум ос тыналыанум. Това порат ма́хум ам палтум та́нки ёхталэгыт ос савсыр пормас ёвтэгыт.

Акв порат Октябрьский районт ялпың хотал олыс, тонт мирколкүщаит а́нумнатпан а́кань юнтуңкве лавсыт. А́канит ялпың хоталн ёхталам му́й хотпатн му́йлуптасыт. Тонт ам этэ-хоталэ юнсахатасум. Ойкамос пыгагум а́нумн нётсыт, төрлөмтыт яктысыт, а́канит юнтсыт.

Рүт ма́хманумн а́нь аква лававём, юнтум пормасанум Ханты-Мансийск ўсн суссылтаңкве ос тыналаңкве вос кётыанум. Ань округ янытыл олнэ мащтыр ма́хум та́нки пормасаныл тот тыналыаныл. Тот савсыр яныг ялпың хоталыт варыглавет, тув ёхталан му́й ма́хум тамле пормас ёмашакв ёвтэгыт. Ам ма́ньщи ос ханты мащтыр ма́хум холтыт юнсахатуңкве ат хасэгум, а́нум иң ханищтахтуңкве эри. Ты ма́гсыл рупатанум тув ат кётыанум.

Мащтыр ма́хум савсыр

ханищтапыл, мастер-классыл варыглавет. Ам ос тамле ханищтапн ялуңкве сака касашегум. Тувыл хоты порат ос хоты ўст манос павылт тамле семинарыт варыглавет, щар ат ваглум. Тыт районт олнэ мащтыр хотпат ёт вайхатэгум, та́н палтаныл ос ханищтахтэгум.

Ань ос ра́ктыл савсыр сувенирытварегум, тамле утыт варнэ ма́гсыл ра́кт ёвтэгум. Овлэт павыл похат ра́кт хилсум, акв а́ньшар варыгласум, күрн хунь пиныслум, тот палыг-покматас. Тыт олнэ ра́ктыл тамле сувенирыт ат тэлэгыт».

Ольга Витальевна а́нь предприниматель-хотпаг ловиньтахты, такви ма́гсылэ рупиты. Тав садикн ос школан яланты, няврамыт хурин по́слыанэ ос савсыр альбомытваре. Мащтыр нэ лавыс, тамле рупата варим ос олн сэлэ. Туп а́канит юнтым ос савсыр сувенирыт варим сав олн селуңкве ат верми. Ос тувыл ты рупата тавён сав ща́гт тоты, тыи ма́гсыл мот рупата ат кинсы.



Людмила
ТАСМАНОВА

Соссаң щёмыят ёмщакв ос пұмыщ кассыт



Алгадьевыт



Динисламовыт

Ханты-Мансийск ўст ёлнэ соссаң маҳум халт «Мама, папа, я – обско-угорская семья» касыл вāрыглавес. Тамле вāрмалъ кāсың тāl «Лылың сōюм» центрыт рўпитан маҳум щёпитāлыглэгыт. Ты тālт хұрум соссаң щёмыят касуңкве тув ёхталасыт.

Тувыл кāсыңёмт касыл матхурип мōт-мōт нам ёныщи, ты порат тав нэ хōтпа ос литература тāl кастыл намыл пинвес. Ань нэ хōтпат хумус нйвраманыл янмалтыяныл, маныр аквёет вāрэгыт, манхурип мўтраң накн тāнаныл ханищтыяныл – тыурыл пуссын потыртасыт ос суссылтасыт.

Мāныщи маҳум халт касуңкве кит нэг Тамара Алгадьева ос Оксана Динисламова ёхталасыт.

Ты нэг сас Хулюмсўнт пāвылт самын патсыг ос хосаттāгыл Ханты-Мансийск ўсн ёлмыгтасыг. Тамара Михайловна аквхуйплов тāl яныт Лиза āгитёнтыл ос кит аңквāгияге Ксения ос Дарья ёт олыс. Оксана Юрисовна кит мāнь āгияге ос аңквпыге ёт олыс. Тав яныг āгитэ Ксениян онтолов тāl, мōтанэ Сāнтыра мāнь āгирищкве тālэ ущ тōвлыс. Каңке пыг Максимн – сāt тāl. Ты

мāнылат нэг щёмыягён ёвылтыт ищхйпың ут хосыт пұмыщ хурит суссылтасыг.

Тувыл Ас ёква Галина Токчевна Шиянова кит апгаге ёт ёхталас. Тав Ямал мāt самын патыс, тав щёмыяң тāгыл хосат ўсувн ёлуңкве вāнтлыс. Ойкатэ ёрн хумыг олыс, тэн сāv нйврам янмалтасыг. Тāн ань пуссын тāнки нйврамыңыг ёмтсыт. Ань касуңкве тотыглам апгаге āщён хатань хум. Галина Токчевна лāвыс: «Мāн сāvсыр мирыл ёлэв, ос амки лўимā мāтем эруптым, пёс наканум элаль тотым нйвраманум, апганум ёлуңкве ханищтыяну». Тав такви щёмыятэурыл потыртаме порат хурит пōслым кит нёпакыг суссылтасаге.

Ёвыл касылт щёмыят хōталакве пōслуңкве лāввёсыт; нйврамыт оманыл манхурип хōталаквёг сусхатэгыт, вос пōслэгыт ос оманыл Хōтал ханса хольт вос пōслыяныл. Тувыл каснэ маҳманув ййквсыт, тāнки щāнь лātңыл стихыт ловиньтасыт. Ётыл пуссын тōтапыл майлувёсыт, ос манхурип ёлупсал рўт маҳманыл ёлэгыт, маныр вāрэгыт – тамле пормасыт тув вос атэгыт. Галина Токчевна

сāлы ёщнэ маҳум пормасыт тув пиныс, Тамара ос Оксана хўл алыщлан манос вōраян маҳум ёщнэ пормасыт тōтапн атсыг.

Юи-ёвылкасылмāгыс атың тэнут юил тотсыт. Шиянов колтāгыл мо-рах пил тотсыт, Алгадьевыт ос Динисламовыт хўл сāритамыт ос хўлың нйнь вāрмыт, пāквсам тотсыт.

Ты щёмыят касылын щёпитахтынёныл сыс «Лылың сōюм» центрыт ханищтахтан āгирищит-пыгрищит с ā ң к в ы л т а п ы л сāңквылтасыт. «Ялпўс маҳум» нампa ансамблин ялнэ āгирищквет ййквсыт ос эргысыт.

Жюри хōтпаг Н. К. Бушуева, «Лылың сōюм» центрыт рўпитан нэ, Е. И. Адина, Хулюмсўнт пāвылныл ёхталам мўй нэ, олыс. Ос кўщай нэг А. Н. Мехнина пёриылвес, тав Юван Шесталов музей-колнакт рўпиты.

Ань хўрмит места Г. Т. Шиянован майвес, китыт местат Т. М. Алгадьева олыс. Оксана Динисламова щёмыятэ нōх-патыс. Ты щёмыят дипломылос мўйлупсал мўйлуптавёсыт. Тувыл мўй маҳмыт пуссын щāй аюңкве пасан вāтан вōввёсыт. Ёмас, пұмыщ касыл та ойгпас.

Тамара МЕРОВА



Шияновыт

Мāньщи нэ урыл потыртасыт

Светлана Селивёрстовна Динисламова, такви ӕпарищ наме Садомина, стихотворениянэ мāньщи ос руц лātныл хансыянэ. Ханты-Мансийск үст нэпак ловиньтан колт тав хансум стиханэ ос тārатам нэпаканэ урыл ань потыртас.

Ӗвлэт Светлана Селивёрстовна ос тав щёмьятэ урыл кина сусылтавес. Тав щāнягэ-āцаге урыл, Кульпас пāвлэ ос такви хансум нэпаканэ, пōслумхурия-нэ урыл тот потыртавес.

Светлана Селивёрстовна лāвыс, стихыт хансункве тав хосат тāгылōвылтахтас. Ӗвлэт туп руц лātныл хансыс. Тувыл Юван Шесталов ёт хунь вāйхатас, мāньщи ойкатавёнлāвыс: «Щāнь лātнув ос мāньщи мирув ке эруптэгын, мāньщи лātныл хансән». Ты

юи-пāлт тав стиханэ щāнь лātныл хансункве та патсанэ. Мāньщи лātныл тāн тāра эрнэ щирыл тэлэлыт. Стиханэ омаатэ, щёмьятэ ос мāвит урыл хансым ӓлэгыт.

Светлана Селивёрстовна потре ань хунтлункве сāv мāхум атхатыглас. Тāн халанылт Вадим Борисович Орлов, Югорский университетт рӯпитан хум, ӓлыс. Тав мāньщи нэ рӯпататэ урыл тох лāвыс: «Светлана Селивёрстовна ёмас стихыт хансы, хурит пōслы, ты



коныпал ос наука щирыл рӯпата вāри. Ань ос нйврамыт мāгсыл «Витсам» нампа журнал тārаты. Нйврамыт м ā н ь щ и л ā т н ы л потыртаҥкве ханищты-янэ. Тав акваг молямлы, аквторыг сāvсыр рӯпата вāрим, сāvтэла вāруҥкве

āлыми».

Ты юи-пāлт мōт мāхум Светлана Селивёрстовна хансум стиханэ, нэпаканэ урыл потыртасыт ос пуссын таве янытласыт.

**Людмила
АЛГАДЬЕВА**

Щāнь лātнуг элалъ тотнэ нак

Мā янытыл щāнь лātнуг янытлан кастыл рётун юсвой этпос вāt нупыл сāтыт хōталэт мāн редакцияв технолого-педагогический колледжин вōвиньтāлвес.

Тот мён акваёт рӯпитан нэ ёт хӯрмит курсыт ханищтахтан агит-пыгыт элы-пāлт ханты ос мāньщи лātнугу в урыл потыртасмён. Ирина Самсонова «Ханты ясанг» газетатэ урыл ёмас потыр щёпитас ос пӯмыщ хурит сусылтас.

Ам ос ты газетагув хоты мōт үсыҥ мāt ловиньтавет, хоты хōн мāt мāн лātнугу в пӯмщалавёг ос ханищтавёг, ты урыл мощ потыртасум. Наука мāгыс ханты ос мāньщи лātнуг ханищтан хōтпат газетагув ӓс вāвёг. Тāн тот сāvсыр лātнуг, потрыт, мōйтыт хōнтэгыт, тувыл матыр-āti эрнэ утыт ханищтэгыт ос диссертацият хансэгыт.

Щāнь лātнуг элалъ тотнэ урыл Ольга Енова ӓс потыртас.



Тав развитие образование нампа институтт нэпак ловиньтан колт рӯпиты. Ольга Владимировна соссаҥ мāхум халт учёный хōтпанувн хансым нэпакыт, словарикыт сусылтаҥкве ёт-тотыглас.

Пуссын ты вāрмалит студен-

тытн ёмщаквёг пӯмщалавёсыт. Тāн ювле пӯмашипа лāтын лāвсыт ос щāнь лātнугу в аквадох элалъ ёмашакв ханищтаҥкве ос матыр-āti пёс вāрмалит вāҥкве лāвхатсыт.

Тамара МЕРОВА

Тән округ кўшай палыл мўйлупсал майвёсыт



Ты 2015 тал Россия Президентын литература талыг лаввес. Ань ты кастыл Ханты-Мансийск ўст ялпың хотал вәрыглавес.

Маньполь этпос 3 хоталә мә янытыл олнә писателит янытлан хоталыг олы. Мән округувт ловиньтан нәпакыт ős сав маҳум хансәгыт. Тән халанылт товат потрыт хансәгыт, товат – стихыт, товат – мөйтыт. Үсувт ханты хум Владимир Енов олы, тав «Ханты ясанг» газетат рүпиты. Ас маҳум латңыл савсыр ляххалыт хансы. Матах тал ювле хулыгум порат тав мөйтыт хансуңкв патыс. Ань тыг мус тит ловиньтан нәпак таратас. Акватә руш латңыл тох намаим олы – «Вёшкатыг олнә маҳум по-

траныл», мотанә – «Мёңкв ойка мўйлупсатә».

Ань ты хум ос тит руш ойкаг Владимир Волковец ос Дмитрий Сергеев округ кўшайов палыл янытлавёсыт, тән хұрум ёмас пуссын «премия губернатора» намба яныг мўйлупсал майвёсыт.

Ты этпос хұрмит хоталт тән ты янытлавёсыт. Округ кўшай ваңын хум Алексей Путин тананылн мўйлупса ос диплом-нәпак мис. Ань тән «писателиг» лавиманыл магыс 2015 тал сыс округув янытыл савсыр ўсытн ос павлытн ялантәкв патёгыт, мир ёт тот хонтхатыглёгыт ос танти ураныл тананылн тах потыртёгыт.

Валентина ВАСИЛЬЕВА

Тром-Аган павыл маҳум

Сургут ўст финно-угорский маҳум ялпың хоталт ам акв ханты нә ёт потрамасум, наме Фёкла Николаевна Суровцева. Тав «Торум ягун мугут» (руш латңыл «Тром-Аганские ребята») намба ансамлит ханты эргыт эрги. Нән ань тав потре ловиньтәлын.



– Мән ансамблов атхуйплов арыгтем тал ты олы, кўшайов Майя Александровна Швейд. Ханты нйвраманув халт руш нйврамыт ős эргёгыт, ййквёгыт. Пуссын аквёет лов арыгтем хотпа. Россия мав янытыл мән сав мат олсүв – Москва, Чита ўст, Бурятия. Савсыр фестивалит олыгланёныл порат тув акваг вөвиньтәлавёв.

Ам колтаглум ёт Тром-Аган павылт олёгум. Вөрт кол оныщёв, тув акваг ялантәлэв, тот сәлыянув олёгыт. Кит колыг халт та яласёв. Кит пыг ос акв апыгриш оныщёгум. Мән пыгум школат ханищтахтаме порат ős ты ансамблин ялантас. Армиян ялыс, ань колтаглә ёт Сургут ўст олы, рүпиты. Яныг пыгум ос сәлың-колыңыг ёмтыс, сәлыянә ўрим вөрт яласы.

Омагум-әтягум нёлсәт арыгтем тал олсёг. Сәт нйврам янмалтасёг – хұрум пыг, нила әги. Мән пуссын тарыг ёлы-пәлт самын патсүв. Колтаглув ань сака



яныг, ягәгиянум-ягыгганум пуссын сав нйврам оныщёгыт. Яныг рүтыг ёмтсүв. Атяв щирыл мән Мултановыт, омав ос Кечимова рүтыл олыс.

Фёкла Николаевна тамле сымың нәкве. Такви мире, такви латңе тав сака эруптыгә, янытлыгә. Ханты мир пёс йис эргыт, ййквыт мирн суссылтәкве тав нйврамытын нёты. Тананыл тав ханищтыянә, тән ётаныл эрги, яласы, нётыянә. Тавән ам сав ёмас, сымың латың лавёгум. Колтаглә ёт пустагыл вос олы, Торум ёт, Отыр ёт вос олы.

Светлана РОМБАНДЕЕВА

Удмурт хум янытлавес

Ювле хультум этпост Ханты-Мансийск үст нэпак ловиньтан колт потрыт, стихыт хаснэ хөтпат янытлавесыт ос «Югра» намба премиял майвёсыт.

Тамле вәрмаль Дмитрий Мизгулин, «Ханты-Мансийский бан-кыт» кұшай хум, вәрыс. Такви тав ос стихыт хансы. 2007 тәл пәсныл нэпак хаснэ 50 хөтпат ты премиял янытлавесыт: тән Россият, Белоруссият, Украинат, Сербият,

Болгарият, Македоният, Грецият ос Чехият олэгыт.

2012 тәлт Юрий Вэла «краеведение» намба номинация щирыл нөх-патыс. Төнтөрн хум «Река Аган со притоками» нэпакэ мәгсылянытлавес. 2013 тәлт мәньщи

ойка Андрей Тарханов, ханты хөтпаг Еремей Айпин ос Мария Волдина хансум нэпаканыл мәгсыл өс тамле премиял майлувёсыт.

Ты тәл нэпак хаснэ онтолов хум янытлаңке ос тән хансум нэпаканыл урыл потыртаңке библиотекекан вөвиньтәлвёсыт. Ты хөтпат халт финно-угорский мирн вәнэ удмурт хум олыс, тав

наме Вячеслав Ар-Серги. Тав финно-угор мирыт щәнэ ләтңаныл нөх-вөрмалтан ос элаль тотнэ мәгсыл янытлавес. Тав такви щәнэ ләтңыл хансум потра-нэ руц ләтңын тол-машласанэ. Удмурт хум вәрнэ рүпататэ мәгсыл өс «Югра» намба премиял майвес.

**Людмила
ТЕТКИНА**

Эрыг-потыр мәгыс хөнтхатыглап

Ты этпос 3 хөталэт Ханты-Мансийск үст өлнэ «Мә-вит ос Элумхөлас» намба музейт стихотвореният ос эргыт хаснэ мәхум акван-хөнтхатыгласыт. Тот Литературная гостиная намба колнак олы, эрыг-потыр тотнэ мәхум тот вәтихал акван-атхатыглэгыт. Ань ос ты этипәланыл намая-саныл – «Певец заснеженного края».

Лов арыгтем хөтпа тәнти хансум стихотворенияныл ловиньтасаныл, төва ос намыңсуиң хөтпа хансыглам потрыт ловиньтас. Акв әги, наме Лиза, татем ёмас стихотворение ловиньтас «Хулиганы», на-сати Валентин Гафт тав хасме. Тав мирн вәнэ мәхум – Маяковский, Есенин, Шукшин ос Высоцкий хум хөтпат пуссын хулиганы ләвиянэ.

Ань тән пуссын әтимыт. Олманылт тән сәв ёмас тәла вәрыс – потрыт, эргыт хассыт, тәнти мәнаныл эруптасаныл, янытласаныл. Валентин Гафт тәнаныл атхунэ эруптыанэ, улылыанэ, ос тав ләвыс, мощ хулиганы ат те олсыт, тасәвит ёмас тәла ат вәрнувыт. Таимәгыс тав тәнаныл нас эрпыңыш тох намталыанэ.

«Солнце» намба теат-

рыт рүпитан ханты нэ Алла Иштимирова-Посохова стихотворениянэ сосаң мәхманув урыл олсыт. «Лылың союм» ныврам ханищтан центрыт рүпитан мәньщи хум Сергей Ремезов «Деньги есть, а счастья нет» пұмыщ потыр потрамас. Акв хум гитарал ёнгыс, тувыл тән пуссын аквёет «Ты да я, да мы с тобой» руц эрыг эргысыт.

Тән халанылт, сүстөмт, мәньщи ман ханты пыг лөляхөлы, тав ос потыртас. Хунь концертаныл оигпас, ам пыг китыгласлум, хотыл тав олы. Насати, мәньщи пыг, Антон Нахрачёв, Хальүс район Тәк павылныл олы. Тыт технолого-педагогический колледжит информационные системы рүпатан ханищтахты. Антон ләвыс, тав мәньтәгыл эрыгсовыт ос потыр-охсат хансуңке патыс. Ома тә Майя Витальевна, әги өпарищ наме Миляхова. Антон ййгрищ оныщи, наме Лена.

Тув мәхум акван-атум нэ Инна Романова ос акв-кит ләтың ләвыс. Тав ты музейт научный сотрудникыг рүпиты.



Антон Нахрачёв

Инна ләвыс, ты тәл литература тәлыг ләввес. Таимәгыс ань төва литературный проектыт тав нупылэ хасвёсыт, кұшайг тав паттувес. Ты хөнтхатыглапаныл тән ос ты тәла щирыл вәрияныл. Тох акван-хөнтхатыгләлуңке тән ань вәтихал патэгыт, потрыт ман стихотвореният хаснэ мәхум пуссын тув вөвияныл. Мән, газетат рүпитан мәхум, тув вөвуңке ос ләввесүв. Ты урыл мән тах элаль хансэв. Иннан ам яныг пұмәщипа ләтың ләвсум. Матъёмас тамле хөтпат олэгыт, мирн пұмыщ потыр, сымын рөвнэ ләтың тотэгыт.

Светлана ХОЗУМОВА



СОССАҢ МИР ӨЛҮПСА

Нэ́квет ос а́гит яны́тлан хо́тал касты́л



А.Вьюткин в а́рум ху́рит

Лүйма сәрипос
(Северная зоря)
№5 (1095), 13.03.2015

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция
Главный редактор –
Решетникова Р.Г.
Телефон (3467)33-36-82

И.о. заместителя главного
редактора – **Узель В.В.**
Телефон (3467)33-23-09

Редакторы
Теткина Л.И., Мерова Т.С.
Телефон (3467)33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467)33-17-52
E-mail: luima@ugracom.ru
Газета размещена на сайте
www.khanty-yasang.ru

Отпечатано:
ОАО «Тюменский дом
печати» г.Тюмень,
ул. Осипенко, д. 81-220

Подписано в печать:
по графику 11.03.2015 г.
в 15.00.; фактически
11.03.2015 г. в 15.00.
Индексы **04399, 54399**
Тираж **1750** экз.
Заказ **461**
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.